

1. august 2007

EM 2007/35

Siunnersuut: Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allannguutissaatut Inatsisartut inatsisaat nr. xx, xx. (qaammat) 2007-imeersoq
(Nunamut tamarmut atuuttuusumik akiliisitsiniarnermi oqartussaasoq)

§ 1

Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaat nr. 3, 2. maj 1996-imeersumi, Inatsisartut inatsisaat nr. 3, 12. maj 2005-imeersukkut aamma Inatsisartut inatsisaat nr. 4, 26. april 2007-imeersukkut allanngortinneqartumi, makkua allanngortinneqarput:

1. § 1, *imm.2, nr. 23-25* imatut oqaasertaliorneqarpoq:

"23) Takornarianut, Nunamilu suliffeqarfiit siuarsarneqarnissaannut Inatsisartut inatsisaat.

24) Biblioteqarnermi Inatsisartut peqqussutaat.

25) Unammillernermi Inatsisartut inatsisaat."

2. Immikkoortumut qulequtaasup "inatsisip atuuffii" siuliatut ilanngunneqarpoq:

"Kapitali 1

"Atuuffigisaq, akiliisitsiniarneq il.il."

3. § 8, *imm. 1-imi*, "akiliisitsiniartartup" allanngortinneqarpoq "akileraaruseriviup" aammalu "akiliisitsiniartartoq" allanngortinneqarpoq: "akileraaruserivik"-mut.

4. § 8-*mi* *imm. 2* aamma 3-tut ilanngunneqassapput:

"*Imm. 2.* Akileraaruserivik pisortat oqartussaasuini allani aamma Pappiaqqanik nalilinnut Centralimit akiliisitsiniartarnermi oqartussaasutut suliassat suliarineqarnissaannut pisariaqartunik paasissutissanik pissarsisinnaavoq.

Imm. 3. Akileraaruserivik nalunaarsuivinnit pisortanit ingerlanneqartunit paasissutissanik akiligassaqartuusup pissutsit atugarisaanut tunngasunik akiliisitsiniarnermut pingaaruteqartunik piumasaqarsinnaavoq. Paasissutissat elektronikkimik atortorissaarutit atorlugit pissarsiarineqarsinnaapput."

5. § 11-*p* kingornani immikkoortumullu qulequtaq "unioqqutitsinerit" sioqqullugu ilanngunneqassaaq:

"Kapitali 2

Akileraaruserivik

§ 11 a. Akileraaruseriviup akiliisitsiniarnermi oqartussaasutut suliaasat ingerlatsissavai.

Imm. 2. Pisassarisanik naatsorsuinerit akiligassiissutinillu assigisaannillu nassiussuinerit pisassaartuusunit isumagineqassapput, imaluunniit pisassaartuusooq sinnerlugu pisassarisanik akiligassiisuusumit. Assigisaanik atuutissaq akiligassaq pillugu akerliliinerit suliarineqartarnissaat.

Imm. 3. Akiligassiissutit akileraaruserivimmut tunniunneqassapput akiliisitsiniarnissaq anguniarlugu, tassani akiliinissamut piffissaliussaq qaangerneqareersimappat, aammalu akiliisitsiniarnerit kinguneqarsimangippata.

Imm. 4. Pisassaartuusorli imaluunniit taanna sinnerlugu pisassarisanik akiligassiisoq, akiligassaartup qinnuteqarneratigut naafferartumik akilersuinissamut imaluunniit akiliinngikkallarnissamut akuersissuteqarsinnaavoq. Pissutsit atuuttuusut immikkut kaammattuutigippasuk, pisassarisat siusinnerusukkut akileraaruserivimmut piffissaq Imm. 3-imi, oqaaseqatigiinni siullerni taaneqartoq sioqqullugu.

Imm. 5. Pisassaartuusup pisassarisat il.il. akilersinniarneqartussanngorlugit akileraaruserivimmut tunniunneqannginneranni, taannaluunniit sinnerlugu akiligassiisuusup, akiligassaartuusooq tunniussineq pillugu allakkatigut nalunaarfigissavaa.

Imm. 6. Pisassaartuusup taannaluunniit sinnerlugu pisassarisanik akiligassiissuteqartuusup, pisassarisanik akileraaruserivimmut tunniussereernerminni akiitsoqartuusup pissutsinik atugarisaasa annertuumik allannguuteqarsimanerannik ilisimasaqaleruni, akileraaruserivik tamanna pillugu ilisimatissavaa.

Imm. 7. Pisassaartuusup, pisassaartuusorluunniit sinnerlugu pisassarisanik akiligassiisup, pisassarisaq akileraaruserivimmut akilersinniarnissaanut nassiunneqarsimasooq tamaat ilaannaasumilluunniit utertissinnaavaa. Akileraaruseriviup utertitsinissamik qinnuteqaat itigartitsissutigisinnaavaa, akiligassaartuusumut tunngasut piffissami nalaanneqartumi suliarineqarpata. Pisassarisat nunap karsianit taarsiiffigineqartussanut ilaasut, pisassaartuusumut, imaluunniit pisassaartuusooq sinnerlugu akiligassiisimasumut utertinneqassanngillat.

Imm. 8. Pissutsinut imm. 1-imiit 7-imut taagorneqartunut tunngatillugu, tamatumani aamma akilersinniakkanik akileraaruserivimmut tunniussinermi periusissaq pillugu, nalinginnaasumik eqqaasitsissuteqartarnermi suleriutsimut minnerpaamik piumasqaatit pillugit, akilersinniakkanik utertitsisarnermut, naafferartumik akilersorneqarnissamut imaluunniit akilinngikkallartinneqarsinnaasut akuerineqarsinnaasut pisassarisat annertussusiinut il.il tunngasunik, aammalu naafferartumik akilersuineri akiliinngikkallarnissamullu piffissaliussat pillugit malittarisassanik Naalakkersuisut aalajangersaasinnaapput. Naalakkersuisut aamma akilersinniakkat elektronikkimik atortorissaarutit atorlugit tunniunneqarsinnaanerit pillugu malittarisassanik aalajangersaasinnaapput.

§ 11 b. Pisassarisat akileraaruserivimmut akilersinniagassanngorlugit tunniunneqartut malittarisassat Naalakkersuisut aalajangigaat malillugit erniaqartinneqassapput. Naalakkersuisut tamatumani pisassarisanut assigiinngitsunut erniat annertussusissaat aalajangersarsinnaavaat aalajangersarlugulu erniat qanoq naatsorsorneqarnissaat.

Imm. 2. Pisassarisat akileraaruserivimmut tunniunneqarnerisa kingornatigut, qaammat siulleq aallarnerfigalugu qaammatit aallartinneri tamaasa ernialerneqartassapput. Erniat akileraarusigaasussanik isertitat

naatsorsorneqarneranni ilanngaataasinnaangillat. Erniat pisassaqaqtuusunut nakkassapput.

Imm. 3. Pisassarisanik akileraaruserivimmut akilersinniagassanngorlugit tunniussanik ernialersuineq akileraaruseriviup unitsisinnaavaa, akiligassaqaqtuusup akiitsuni akilersinnaangippagit, ukiunilu tulliuuttuni qaninnerpaani akiitsutigut pisussaaffimminik naammassinnissinnaanissaa ilimanaateqanngippat. Akileraaruseriviup ernialersuineq ingerlateqqilersinnaavaa, akiligassaqaqtuusup aningaasaqarnikkut pissutsit atugarisai ajunnginnerulerpata imaluunniit paasineqarpat, akileraaruserivik, ernialersuinermik unitsitsinissamik aalajangiinerup nalaani, paasissutissanik attuumassute-qartunik tamakkiisumik pigisaqarsimanngitsoq.

Imm. 4. Akiligassaqaqtuusut inuinnaasut kisimik imm. 3-mi pineqarput.

Imm. 5. Imm. 3-mik atuinissamut Naalakkersuisut malittarisassaliorsinnaapput.

§ 11 c. Akilersinniakkanik assigisaannillu akileraaruserivimmut tunniussinermi akileraaruseriviup akiligassaqaqfigisatut pisinnaatitaaffiit pigilersarpai, tamatumani aamma taarteqarnissamik qinnuteqarsinnaatitaaneq, pisassarisanit ilanngaasinnaaneq, pigisanik akiliuteqartitsisinnaaneq akissarsianilluunniit ilanngaassuisitsineq, akiliutit tulleriiarissutigisinnaanerit, eqqartuussivikkoortumik suliassiisinnaaneq, akiliisinnaajunnaartutut suliarineqarnissamik qinnuteqarneq, agguagarsiassanik akuersisinnaaneq akiitsunillu iluarsaassiffigineqarnissamut il.il. siunnersuuteqarsinnaaneq. Akileraaruserivilli akiliisinnaajunnaarneq pillugu inatsisip atuuttussanngortinneqarneranik pequssutip avataani isumakkeerinnissamut tunngasunik suliani akiligassaqaqfiusup pisussaaffiinik tigusaqanngilaq.

Imm. 2. Akileraaruseriviup akiliisitsiniarnermut ilaatillugu naafferartumik akilersuinissaq akuersissutigisinnaavaa imaluunniit akiliinngikkallarnissamut akuersissuteqarsinnaalluni. Inatsisini allani naafferartumik akilersuineq akiliinngikkallartitsinerlu pillugit erseqqinnerusumik malittarisassaqaqtillugu, malittarisassat tamakkua suli atorneqartussaapput.

Imm. 3. Naalakkersuisut imm. 1 aamma 2-mi malittarisassat naammassineqarnissaannut erseqqinnerusumik malittarisassanik aalajangersaasinnaapput. Naalakkersuisut aamma pisassaqaqtuusut pisortanilu oqartussaasut allat elektronikki atorlugu atortorissaarutit atorlugit pisassaqaqtuusumut pineqartumut tunngatillugu akiligassanut kinguaattoorutit amerlassusaannik, aammalu pisassaqaqtunut allanut tunngatillugu akiligassanut kinguaattoorutitik peqarnerisat akileraaruseriviup paasissutissanik nalunaarsugaanut isersinnaanerannut malittarisassanik aalajangersaasinnaapput.

Agguaanermut aalajangersakkat

§ 11 d. Kommunit akiliisitsiniartarnermi oqartussaasutut suliassanik suliarinninnerannuinaq atatillugu pisinnaatitaaffinnut pisussaaffinnullu akileraaruserivik 1. januar 2008-miit pisinnaatitaaffeqalerlunilu pisussaaffeqalissaaq.

Imm. 2. Akileraaruseriviup kommunini tjenestemandit atorfeqartitaasut, akiliisitsiniarnermi suliassaannarnik annertunerpaamilluunniit suliqaqtut, 1. januar 2008-miit atorfeqartitarilissavai. Tjenestemandit Kalaallit Nunaanni Namminersornerullutik Oqartussani atorfeqartitaanermut nuussapput, maannamut

atorfimmi atugassarititaasut assinginik tunngaveqartumik.

Imm. 3. Akileraaruserivik akiliisitsiniarnermi suliassat ingerlanniarnerni atugassanik kommunimi pineqartumi illunik ilaannaanilluunnit attartorsinnaapput allaffimmilu atortunik il.il. attartornissamut isumaqatigiissuteqarluni.

§ 11 e. Akileraaruseriviup kommunit akiliisitsiniartarnermi elektronikki atorlugu atortut atugarisaat atorsinnaavai.

Imm. 2. Kommunit akileraaruserivik kommunit akiliisitsiniarnermik suliaqarnermi elektronikki atorlugu atortorissaarutininik atortunik atuisinnaatissavaat, tamatumani aamma kommunit akileraaruserivik naatsorsuuserinermut, naatsorsuutininik il.il. tunngasunik paasissutissaataanut, akileraaruseriviup naliliinera malillugu akiliisitsiniarnermi suliassanik ingerlatsinissamut pisariaqartunik, terminalinut isersinnaatissavaat.

§ 11 f. Suliassat sulisullu kommuneniit akileraaruserivimmut, inatsit manna naapertorlugu nuunneqarnerisa ingerlanneqarnerannut Naalakkersuisut malittarisassanik aalajangersaasinnaapput. Tamatumani kommunit akiliisitsiniarnermut tunngasutigut innuttaasunik sullissinerat pillugu sulianilu allagaatit allagaatinillu toqqortaait qanoq annertutigisumik akileraaruserivimmut nuunneqarnissaat pillugu malittarisassanik Naalakkersuisut aalajangersaasinnaapput.

Akiliisarnerit

§ 11 g. Naalakkersuisut Tele/Post-imik, KNI A/S-imik aningaaserivinnillu isumaqatigiissuteqarsinnaapput 300 koruunit ataallugit, pisassarisanut akileraaruserivimmi akilersinniagaasunut, akiliinernik suliaqarnermut akiliutinik akiliisitsinnginnissamik."

6. § 12 aamma qulequtaq "Unioqutitsinerit" sioqqullugit ilanngunneqassaaq:

"Kapitali 3

Pineqaatissiissutit, atuutilerfissat il.il."

7. § 12-p kingornanut qulequtarlu "atuutilerfik" sioqqullugu ilanngunneqassaaq:

"§ 12 a. Akileraaruseriviup naatsorsuutigippagu unioqutitsineq akiliisitaanermi sakkortunerusumik nassataqassanngitsoq, Naalakkersuisut, Naalakkersuisulluunnit tamatumunnga pisinnaatitaata, pineqartoq nalunaarfigisinnaavaa suliaq eqqartuussivikkut malersuinertaqanngitsumik aalajangiivigineqarsinnaasoq, pineqartup unioqutitsineri pisuunini nassuerutigippagu piffissallu erseqqinnerusumik taaneqartup, qinnuteqarnikkut kinguartinneqarsinnaasup, qaangiutinnginnerani, nalunaarummi akiliisitaassutissatut nalunaarutigineqartoq akilerniarlugu nalunaarutigalugu.

Imm. 2. Imm. 1-imi nalunaarummut oqaatigineqartumut tunngatillugu Kalaallit Nunaanni Eqqartuussisarneq pillugu inatsimmi unnerluussutip imarisassai pillugit malittarisassat taamatuttaaq matumani atuupput.

Imm. 3. Akiliisitaanermi akiligassaq piffissaagallartillugu akilerneqarpat, imaluunniit

aalajangiinerup kingornatigut akilersinneqarpat, annertunerusumik malersuinissaq taamaatinneqassaaq.

§ 12 b. Malittarisassani, Inatsisartut inatsisaat manna malillugu pilersinneqartuni, aalajangersakkanik unioqqutitsinermut akiliisitaanermik pineqaatissiinermut malittarisassat aalajangersarneqarsinnaapput.

Imm. 2. Malittarisassani Inatsisartut inatsisaat manna malillugu pilersinneqartuni, aktiat anpartilluunniit tunngavigalugit ingerlatseqatigiiffimmit, piginneqatigiiffittut ingerlatsivimmit, peqatigiiffimmit, imminut pigisutut suliffeqarfimmit, aningaasaateqarfimmit, naalagaaffimmi oqartussaasunit, Kalaallit Nunaanni Namminersornerullutik Oqartussanit, kommunemit, kommunit ataatsimooqatigisaannit assigisaannillu unioqqutitsinerit akiliisitaanermik pineqaatissiissutigineqarnissaannut malittarisassat aalajangersarneqarsinnaapput.

§ 12 c. Akiliisitaassutit §§ 12-12b naapertorlugit akiliisitsissutaasut nunap karsiata pisassarai."

§ 2

Imm. 1. Inatsisartut inatsisaat 1. januar 2008 atuutilerpoq, takuulli imm.3.

Imm. 2. Tamatumunnga peqatigitillugu pisassat akileqquneqartarnerannik akiliisitsiniartarnermillu kommunit suleqatigiinnerat pillugu Inatsisartut inatsisaat nr. 4, 12. maj 2005-imeersoq atorunnaarsinneqarpoq..

Imm. 3. § 11e aamma § 11 f atuutilerput, Inatsisartunut, Naalagaaffiup sinniisaanut, politiinut, kommunenut eqqartuussiveqarfimmullu ullormi nassiunneqarneranniit sapaatit akunneri marluk qaanngiunneranni.

Namminersornerullutik Oqartussat, ulloq xx. qaammat 2007

Hans Enoksen

/

Aleqa Hammond